



Iouianus patre Varomanno Segeduni in Panonia natus & educatus est. hunc pater præceptoribus erudiendū dedit, atq; omnis generis uirtutibus instituit. Itaq; filius ingenio ad omnes disciplinas promptissimo haud parum liberalibus artibus profecit, & Christianorum fidem religiose coluit. Cum autem pater eius militia clarus, & ubiq; notus in auitos agros secessisset, & emeritus quiescendo agriculturæ operam daret, filio author fuit ut Romana castra sequeretur. per nocturnam enim quietem admonitus est filium Iouianum purpura potiturum. Itaq; Iouianus fortitudine singulari effecit, ut breui in exercitu ordines duceret, &

millenarius esset. Cum autem postea Iulianus Cæsar Christianos ab exercitu remouisset, maluit ipse quoq; cingulum militiæ relinquere, quàm Imperatori obedire & idolis sacrificare. Accidit autem paulo post, cum Iulianus expeditionem contra Persas fusciperet, ut hūc Iouianum ad se uocaret, ac propter uirtutes ob Christianam religionem molestare desisteret. Cum uerò Iulianus ob suam impietatem à hoste interfectus esset, atq; Romanorum exercitus in locis periculosis ab hoste urgeretur, hic Iouianus ad Imperium uocatus est. Verū is cum uiolenter à militibus ad Imperium raperetur, recusauit illis imperare, qui à sua religione essent alieni. Tum milites alta uoce inclamarunt, se quoq; Christum colere. Ob amorem enim Iuliani facilè omnes in hunc Iouianum consenserunt, quod una tantum littera immutata idem nomen esset. Interea Saporex rex Persarum audita Iuliani morte, suis copijs collectis, Romanos adorit, atq; in loco iniquissimo castris inclusit. Itaq; cū ingēs penuria annonę esset, Imperator cū Persis, magna calamitate Romani Imperij, fœdus triginta annorum iniit, & nobiliores tribunos obsides dedit: hocq; modo exercitum ex confragosis & asperis montibus in tutum produxit.